

Канон пред иконой Богородицы «Державная»

Празднование 2 (15) марта

Тропарь, глас 4-й

Града Сионска взыскующе, под Твой покров, Дѣво Чистая, днесь притекаем, и никтоже возможет на ны, яко несть град силен, аще не Сущаго Бога, и несть ина крепость, аще не милость Владычицы Девы.

Канон, глас 1-й

Песнь 1

Ирмос: Отверзу уста моя, и наполнятся Духа, и слово отрыгну Царице Матери, и явлюся, светло торжествуя, и воспою, радуясь, Той чудеси.

Припев: Пресвятая Богородице, спаси нас.

Самоизмышленная пагуба покрыла есть всю землю Твою, и мрак велий воцарися днесь в вертограде Твоем. Тяжко ми есть, и рыдаю Тебе, Мати Пречистая, и, аще услышиши; ничесоже устрашуся, и воспою имя Твое, славно бо прославися.

Пресвятая Богородице, спаси нас.

Покаянию научи мя, Владычице, да день и ночь излию слезы моя и да смирен от враг моих воскликну Тебе: никтоже чист, разве Тебе, Отроковице Чистая, и сохранит мя Держава Твоя, славно бо прославися.

Пресвятая Богородице, спаси нас.

Аз из глубины зол моих вопию Ти, и не премолчит стон мой пред Тобою: виждь, о, виждь, Владычице Дѣво, и не отвержи мене, услыши убо вопль гласа моего и покрый мя ризою смиренномудрия Твоего, славно бо прославися.

Слава: Суд гневен прииде на ны, и разсыпая радость людей Твоих, вси бо плачем и рыдаем и тако глаголем: о мечу Божий, доколе не упокоишися? Престани убо, пощади ны, и воспоем Державу Владычицы нашея, славно бо прославися.

И ныне: Из ноши дел прелести погубиша ны, пал есть Сион, и заключени есмь; Иерусалиме, Иерусалиме, почто тако омрачился еси? Того же ради и возопийм Владычице сице: токмо Твоя Держава сохранит ны, славно бо прославися.

Песнь 3

Ирмос: Твоя песнословцы, Богородице, Живый и Независтный Источниче, лик себе совокупльшия, духовно утверди, в Божественней Твоей славе венцев славы сподоби.

Пресвятая Богородице, спаси нас.

Обольсти мя змий, клеветник бо есть, и, душевредное в себе насаждая, смутилось сердце мое. Яко мертв, пребываю и киими словеси о себе возрыдаю? Но Тя молю, Владычице, молю и глаголю: обладай над ним и от

грехá моего очисти мя.

Пресвятáя Богородице, спаси нас.

Горьким плачем моим, яко воду, излию сердце мое, сокрушение мое яко жертва Тебе, и молю Тя, Пречистая: ей, не отврати мене, раба Твоего, сохрани убо и до последнего дне.

Пресвятáя Богородице, спаси нас.

Очи мои померкнуте от язвы моея, и утрудí мя бремя мое. Идеже есть слава моя? И заключи мене недруг и враг, аз же, яко милость, приемлю úзы моя и пою, веселяся: никто убо, яко Бог, вознесет Сый Христа Своего и Матерь Его, Владычицу нашу.

Слава: Руководение подаждь ми, Нищепитательнице, и озари мя светом, еже от Тебе во истощании просиявшим. О Богородице и Мати Бога моего, буди же и мне заступлением верным.

И ныне: Душетленными помыслы люте стужаемь есмь, и тяжело ми есть. Не ли презриши раба Твоего? Молю убо Тя, Пречистая: изведи мя от гноища моего, исцели раны моя и спаси мя, Владычице, спаси мя.

Господи, помилуй (*трижды*).

Седален, глас 3-й

О Лествице неизреченна и преизрядна, яко же и лествица, юже виде праотец, с Небесí нисходящу, тако и Ты, Богоневесто, Небо и землю сочетавшая, Восхождение Ты еси, имже и упасемься от бед.

Слава, и ныне: Христа Бога и Сына Твоего, между двою разбойнику на Кресте висима, зряще, горько рыдала еси, Мати, и жало вниде в сердце Твое. О Владычице Дево, болѣзнующи убо Самá, спаси днесь вся удрученныя, истязуемыя люди Твоя.

Песнь 4

Ирмос: Седяй в Славе на Престоле Божества, во облаце легце прииде Иисус Пребожественный Нетленною Дланию и спасе зовущия: слава, Христе, силе Твоей.

Пресвятáя Богородице, спаси нас.

Истощание прииде на рабы Твоя, и дом наш оставися празден и пуст. Хожду и зываю, но несть ми спасающая, едина убо смерть отвещавает на глас мой, и, рыдая, молю Тя и глаголю: не отвержи мене и Ты, Дево Чистая, да спасен буду.

Пресвятáя Богородице, спаси нас.

Цветоносную простри, Владычице, руку Твою, и оживет вертоград Твой, и нищие обрящут хлебы своя, и убозии ризы своя, и вси восхвалят имя Твое, яко воистинну неизреченна есть милость Твоя.

Пресвятáя Богородице, спаси нас.

Егда восхощеши, никтоже сокрушит ны, яко великое дерзновение обрела еси у Христа Бога, Сына Твоего и, сие зряще, вопиём Ти, Владычице, да сохраниши и ны под кровом Твоим.

Пресвятáя Богородице, спаси нас.

Православнии христианы, под Твою милость днесь притекаем и, явление

честныя иконы Твоея светло празднующе, сице глаголем Тебе: простираеши и нам, Благодатная, необоримую ризу Свою.

Слава: Разумейте, непокоривии языцы, и не хвалитесь о мышце своей, зане един есть град несокрушим, и сия Твоя, Приснодево Владычице, Держава и Царство, еже и стоит до скончания века.

И ныне: Аз, егда и во узех, но Тобою, Отроковице Чистая, вину свободь есмь, и не в страх ми умаление мое есть, но яко злату – горнило и огонь, сие бо разумя, славлю узы моя и величаю Тя, Непорочную Деву.

Песнь 5

Ирмос: Ужасошася всяческая о Божественней славе Твоей: Ты бо, Неискусобрачная Дево, имела еси во утробе над всеми Бога и родила еси Безлетнаго Сына, всем воспевающим Тя мир подавающая.

Пресвятая Богородице, спаси нас.

Водворяет ны змий во юдоль плача и чаяний злых. Не можем убо терпети скорби своя, но Ты, Богородительнице, простираеши нам покров Свой, и спасени будем от зол.

Пресвятая Богородице, спаси нас.

Отроковице Дево, спасла еси нас от работы вражия, и тем красно написася имя Твое: Царица миру Ты еси, и Держава Твоя даже до последнего дне.

Пресвятая Богородице, спаси нас.

Света неприступна Мати Ты еси, и все днесь подвижися тма супротивная, никтоже возможет на ны, яко с нами Владычица наша, и слава Твоя нескончаема есть.

Пресвятая Богородице, спаси нас.

Людие Божии, друзи моя, уверуйте во Христа, Бога нашего, и в предивно Его Родшую, храняще убо заповеди Бога Вышняго и обрящете душам вашим мир и велию милость.

Слава: Ангели, и тии прославиша Тя, Владычицу всяческих и паче Неба Превознесенную, поют бо Христу, Сыну Твоему: искупил еси люди Твоя, и в человецех благоволение.

И ныне: Величие Твое кто исповесть, Богородице, яко паче смысла родила еси Бога Слова, и не может язык человек достойно Тя пети, но прими милостивно молитву мою и сохрани раба Твоего.

Песнь 6

Ирмос: Божественное сие и всечестное совершающе празднество, Богомудрии, Богоматере, приидите, руками восплещим, от Нея рождагося Бога славим.

Пресвятая Богородице, спаси нас.

Ночь, и мрак, и воды пререкания люте истязуют землю Твою, се убо прещение Божие и гнев Того есть, но молю Тя, Пречистая, молю и глаголю: аще хочещи – можещи, и вем, яко умолит Отроковица за Державу Свою.

Пресвятая Богородице, спаси нас.

Уязвихомся от змия, люди Твоя, и, яко из адова чрева, вопиём Ти, Благодатная Дево: не нам, но ради от Тебе избранных и ангельское житие возлюбивших, спаси, Богородице, и вся православныя.

Пресвятая Богородице, спаси нас.

Юзники окованныя, что, о Царице, без Тебѣ возможем и како от грех своих упасѣмся? Но Ты, яко Благая, утверди в нас святыню Свою и не отвержи молящихся Ти.

Пресвятая Богородице, спаси нас.

Затмися солнце мое и дух мой изыде в непотребие земли, но темже и вознепщеваях о свете Солнца Правды и смирих гордыню мою, Тебѣ взываю, Дево Чистая, да спасеши раба Твоего.

Слава: Единомудренни да пребудем, людие, и да возрадуемся о ранах, иже от Сотворшаго суть, яко, наказуя, наказаны Господь, не смерти убо предаде и научи разумети волю Свою.

И ныне: Мертвии возстанут, и извержет земля кости своя, зане всех совоскресит нас истощание Претерпевый, и Сей есть Царь миру, и Матерь Его – Владычица наша.

Господи, помилуй (*трижды*). Слава, и ныне:

Кондак, глас 8-й

Взбранной Воеводе победительныя песни приносим, яко даровася нам Держава Твоя, и ничесомже устрашимся, не от мира бо спасение наше, но Превознесенныя Владычицы милосердием ограждаемся и тому днесь радуемся, яко прииде Заступница на стражу земли Своея.

Икос

Зряще икону Твою: во облацех – Бога и Отца и на рудцах Твоих – Христа Бога, Сына Твоего и Спаса миру, поклоняемся ко храму Твоему и, лобызая честныя нозы Твоя, взываем Ти сице: воистинну даровася нам спасение велие и надежда наша выну пред нами, яко прииде Владычица на стражу земли Своея.

Песнь 7

Ирмос: Не послужиша твари Богомудрии паче Создавшего, но, огненное прещение мужески поправше, радовахуся, поюще: препетый отец Господь и Бог, благословен еси.

Пресвятая Богородице, спаси нас.

Ликовствуите, верных собори, и пойте Царевы, Иже на Горних сидящу, яко благословен и дивен есть Бог наш, Великий Ревнитель, и страшен Горний Сион и прославлен во веки.

Пресвятая Богородице, спаси нас.

Юдолию плача земля показася Твоя, огонь палящ прииде и объят ю, но не рыдайте, братие, ибо, яко купина неопалима, храм от Сиона и прославлен во веки.

Пресвятая Богородице, спаси нас.

Имамы Тя, Росодательницу, и николиже устрашимся ветров, от пустынь воздвигаемых, Тя бо, Пречистую, молим и тако зовем Ти: оживи вертоград Твой, и будет прославлен во веки.

Пресвятая Богородице, спаси нас.

Слово лестче положиша на мне врази моя, и сокрушает мя рог непокоривых.

Друзи мои, и тии оставиша мя; но не остави мене и Ты, Владычице, и спаси мя, яко Мати Бога моего Ты еси, и храм Твой прославлен во веки.

Слава: Обручи мя, о Приснодево, святыне Своей, и не убоюсь от тем враг моих, люте нападших на мя, и тако возопию Ти: Иерусалиме, Иерусалиме, святыи еси град и прославлен во веки.

И ныне: Херувими, и Серафими, и вся Небесныя вои поют Тя, Препоблагословенную, и, вопиюще, глаголют: несть храм иной, разве Тебе, и сей препрославлен во веки.

Песнь 8

Ирмос: Отроки благочестивыя в пещи Рождество Богородичо спасло есть; тогда убо образуемое, ныне же действующее, вселенную всю воздвизает пети Тебе: Господа пойте, дела, и превозносите Его во вся веки.

Пресвятая Богородице, спаси нас.

Рыдание мое приими, Владычице моя, и угаси огонь, еже от супостат разжжен есть, да познаю Бога моего и со тщанием воскликну Ему: пойте и превозносите Его во веки.

Пресвятая Богородице, спаси нас.

Алчущ есмь, и зываю Ти, Владычице, и молю Тя, да не истление будет ми в честь, но милость Твоя, тако о ней возглаголю: благословите, вся дела Господня, Господа, пойте и превозносите во веки.

Пресвятая Богородице, спаси нас.

Непрестающе гордыню отжени от мене, Благодатная, и угаси огонь язвы моея, и, не яко дым, но яко благоухание Господеви, воспою братием моим: отроцы, благословите, священницы, пойте, людие, превозносите Господа во веки.

Пресвятая Богородице, спаси нас.

Из пещи разжжения моего, яко из адова пламени, вопию Ти: о Владычице Дево, окропи мя росью слез Твоих, у Креста Сына Твоего излианных, и воскликну, зывая: благословите Матерь Бога Вышняго, Господа пойте и превозносите во веки.

Слава: Любопытное око мое просвети светом смиренномудрия Твоего, и познаю волю Сотворившаго мя, и не от мудрования моего, но сердцем моим воскликну о Нем: Его пойте и превозносите во веки.

И ныне: Юдуже грех, тамо и скрежет зубом, но не премолчи, Дево Чистая, и даждь ми глагол разумения, да потерплю бремя мое и воскликну о Боже, Спасе моем: благословите, вся дела Господня, Господа, пойте и превозносите во веки.

Песнь 9

Ирмос: Всяк земнородный да възграется, Духом просвещаемь, да торжествует же Безплотных умов естество, почитающее священное торжество Богоматере, и да вопиет: радуйся, Всеблаженная Богородице, Чистая Приснодево.

Пресвятая Богородице, спаси нас.

Дыхание бурное не сокрушит и единого от забрал стены Твоея. Храм Твой утвержден есть и не подвижится вину, и, тому радуящися, поем Ти: слава Державе Твоей.

Пресвятая Богородице, спаси нас.

Тайная вся обнаженни показуются днесь. Свят есть суд Твой, о Господи, и свято имя Твое: но виждь, Боже, яко среди братии моих Матерь Твоя, и преложи гнев Твой.

Пресвятая Богородице, спаси нас.

Всеоружием веры опояши мене, Благодатная, и смиренномудрием укрепи десницу мою, да, яко страж, пребуду, воспевая имя Твое, и, аще поможеш ми, не подвижуся даже до смерти.

Слава: Огнезрачный жезл Твой, яко пламень чист, и сим ведеши, Путеводительнице, люди Твоя, да соблюдутся от бед христианы.

И ныне: Ярость адова и та не возможет на ны, зане свят есть храм Твой и о семени Твоем клятсся Давид, непрестающа хвала Твоя и Держава Твоя до скончания века.